



Flugmódeláhugamenn úr Reykjavík fjölmenntu á hinn glæsilega flugvöll um sl. helgi.  
Reykjanesmynd: Hrós.

# „Besti flugmódelaflugvöllurinn á landinu á Suðurnesjum“

—sögðu flugmódeláhugamenn úr Reykjavík, sem voru að leik á glæsilegum flugvelli út við Garðsvég

**KEFLAVÍK:** — „Þetta er besti flugmódelaflugvöllurinn hér á landi,“ sögðu nokkrir Reykvíkingar úr Flugmódelafélaginu Þýti, þegar þeir voru að leik á glæsilegum flugmódelaflugvelli, sem er utan vegar rétt við nýja kirkjugarðinn á leiðinni út í Garð.

Tveir Suðurnesjamenn, þeir Gísli Hauksson (í Stapa) og

Þorsteinn Hraundal löggreglubjónn hafa byggt þennan flugvöll upp og hafa þeir lagt mikla vinna í að halda honum í sem bestu standi. „Það er nokkuð undarlegt að aðeins tveir menn hér á Suðurnesjum hafi flugmódelflug sem áhugamál, þegar svona frábær flugvöllur er hér á svæðinu,“ sögðu flugmódeláhugamennirnir úr Reykjavík.

Þeir sögðust koma hingað nokkrum sinnum yfir sumartímann til að nota flugvöllinn, sem er vel byggður og skemmtilegur.

Flugmódelin ná allt að 150 km hraða og er hreint ótrúlegt hvað hægt er að láta flugvélarnar gera. „Flugmódelin geta gert ýmsar listir sem flugvélar geta ekki,“ sagði einn af flugmódeláhugamönnum, sem sagði að flugmódelaflug væri

mjög skemmtileg íþrótt og til að ná árangri yrðu þeir að æfa eins og aðrir íþróttamenn.

Flugmódeláhugamennirnir voru með ýmsar gerðir af flugmódelum. Nýtískulegar orustubotur, gamlar tvíþekjur og einnig mátti sjá gamlar stríðsflugvélar, sem unnu ýmis afrek í seinni heimsstyrjöldinni.

„Eins og í öðrum íþróttum er byrjunarkostnaðurinn mestur. Þá aðallega í sambandi við fjarstýribúnaðinn. Flugmódelin sjálf eru ekki svo dýr, en við búum þau yfirleitt sjálfir til eftir teikningum. Það tekur þetta tvær til þrjár vikur að smíða eina flugvél. Auðvitað er alltaf skemmtilegast að fljúga flugvélum sem maður hefur sjálfur smíðað,“ sagði einn af flugmódeláhugamönnum.



Hér á myndinni má sjá nokkur sýnishorn á flugmódelum við hliðina á stærri flugvél.